



Groupe parlementaire

Här Fernand Etgen  
President vun der Deputéiertechamber  
19, um Krautmaart  
L-1728 Lëtzebuerg

Lëtzebuerg, den 22. September 2022


Här President,

esou wéi d'Chambersreglement et virgesäit, bieden ech lech, dës parlamentaresch Fro un d'Madamm Kulturminister an den Här Minister fir bannenzeg Sécherheet weiderzeleeden.

De Police-Musée ass elo an engem neie Provisorium zu Capellen ënnerkomm (Artikel am „Quotidien“ vum 20. September), nodeems seng al Plaz um Verluerekascht jo wéinst Baufällegkeet vum Gebai huet missen zougemaach ginn. Et kann ee begréissen, datt dat intressant an historesch wäertvollt Ausstellungsmaterial elo nees dem Publikum zougänglech ass, mee et stelle sech awer nach eng Rëtsch Froen:

1. Kënnt Dir confirméieren, datt de Site zu Capellen nëmme fir 5 Joer virgesinn ass?
2. Denkt d'Regierung un eng permanent Solutioun, wou eventuell och d'Besoine vun aneren uniforméierte Corpsen (Arméi, Douane, Rettungsdéngscht, Fierschter, Post ...) kéinte mat berécksiichtegt ginn?
3. Nieft den Uniforme sinn ee vun deene visibelsten Dealer vun der Aarbecht d'Gefierer vun dësen Corpsen. Et wär sécher intressant, esou vill wéi méiglech vun deenen an hirer zäitlecher Evolutioun ze presentéieren. Ass dodru geduecht?
4. Am Fall wou, ass d'Regierung bereet, d'raimlech Ufuerderunge fir d'Ausstellung vu Gefierer mat ze berécksiichtegen an och de Käschtepunkt, deen et géing bedeiten, esou Gefierer ze fannen, ze kafen an ze erhalen, ze budgetiséieren?
5. Wéi eng Plaze géingen a Fro komme fir esou e Musée? Huet d'Regierung scho Sitten envisagéiert? Wär et méiglech op Plazen wéi dem Fonds de Gras oder bei aneren, schonn existente musealen Infrastrukturen e Musée fir déi uniforméiert Corpsen ze schafen?

Mat déiwem Respekt,



Fred Keup  
Deputéierten



Fernand Kartheiser  
Deputéierten